



**Verhalen  
in het dialect 7**

**Martin Wichink**

Veurwoord.

As heel jong is Martin Wichink begunn met ut schriem van verhaalen.

Ut gaf hem de meugelijkheid um tiedens ut schrijven zich terugge te trekken in zien eigen deur letters en woorden gevisualiseerde wereld.

Disse “verzameling verhaalen” is un bundeling “ongesleppen” emoties uut ut dagelijkse laeven, vormmegeem in verhalen en gedichten van disse prieswinnende auteur.

Disse prachtige saamgestelde bundel van Martin’s meest toonaangeemde teksten, gefte de laezer un verfrissende unieke kiek op de wereld.

Disse verhalen is ut zeumde verzamelingsbundel welke op disse maniere in openbaarheid kump en is ontstaone uut zijn passie veur schriem.

Martin Wichink.

Inhoud van disse verzameling verhalen:

### **Klinkers en medeklinkers.**

Wat un stukkje oale en nieuwe stroate met mekaare verbind.

### **Lust(deu)rum.**

Wie jubieleerd kreg un feesie. Alleene loop ik der op veuruut, dus hek tied um der oaver te fielesofeeren.

### **Onweer in Hoarle.**

Ok Hoarle ontkump nie an onweer. Dat ut hier weh is kan spoken, leas ie hier.

### **Puur natuur.**

As ie op un boerencamping zit, dan kuj mooi genieten wat de natuur oe bied.

### **Stoek'n op de snelweg.**

Wat mie noe oaverkwam op de A-ééne, det wul ik nie weer metmaaken.

Wens oe weer völle wille bie ut leazen van de verhalen.

## **Klinkers en medeklinkers.**

Vin ut weh leuk dat ze noe korte stukkies in ut gelle buukie skrief. Wet natuurluk nie of ze bliej bint dat ik int plat skrief. Det mut eigenluk weh meugn, want det is in ut dorp tog de voertaal. Det muj tog in ere hoaln vind ik. Ut maakt oons zo eigen.

Laats leupen mien vrouwe en ik un runtie um de pas hen. Nie dat wie um de pas hen loopt. Nee, eigenluk loop ie der langs. Via de Mölnweg, Raamsweg en de van Rijnweg, kwaam wie bie de Kapperkaamp an. Doar han ze net de nieje stroatklinkers der opnie'j inne leg. Ut ligt der weer mooi bie. Weh zag ik allemoal van die runties op de boamkaante op de klinkers. Toen vreug ik mie of woar det noe veur was. Meer grip met de sneej in de winter of tog veur wat aans?

Toen wie ant enne kwaam van de Kapperskaamp, kwaam wie uut op de Hasselbachweg. Doar heb ze heele aandere klinkers. Un stuk fiener en an de hoeken bint de skarpere huukies der un bettie of. Wie bleem em stoane, want der kwaamp nog un auto an riene. Ik keek nog em opnie'j na ut verskil van de klinkers en toen begreep ik ut weh. Hier was diepe oaver noa

e'dach deur de klinkerspecialist bie de gemeentewarken. Ut was tiepies iets wat bie Hoarle past. Zo breng ie old en nie-j Hoarle bie mekaare. De gesettelde luu die Hoarle hebt grootte brach woont an de Hasselbachweg, woar de skarpe raanties der un bettie of bint en bie de nie'jbouw met de nieuwe klinkers. Mooj strak, vol nie'je ideejen veur un leafbaar Hoarle. De punties op de klinkers steet natuurlijk veur dat ze doar völle wichter mag kriegn um de laagere skoole in leam te hoaln. As de wichter dan grooter bint, dan komt de olders ok weh meer met um vrie'jwillegerswark te doene. Doar is noe nog weh is gebrek an. Die punties liekt dan ok eg op de kop van un eggen droadnagel. Aj hier eenmoal verankert bint, dan wuj nooit meer vot.

Hoppe daj ut stukkje mooi hebt e'vun. Skriefe vaste nog weh is weer. Der is nog vaste weh meer te belêm in Hoarle. Doar skrieef ik dan graag weer oaver.

## Lust(deu)rum.

Un lustrum heb ie aj aans vief, tien joar of langer a aans bie bint e'wes as vrie'jwilliger of veur un baas. Ma vandaage bin ik jullie allemoal veur. In december 2016 heb ik mien eerste proefstukkje in ut gelle buukje e'skreem. Vanof januari 2017 bint wie met vief luu begunnen met stukkjes te plaatsen. Dus het is noe nog net gin lustrum. Det giet um de vief joar, dus ik mutte nog em.

Ma wuss ie weh dat ut woord lustrum heel apart e'skreem is. Ut bint eigenluk twee woorden. Nameluk lust en deurum. Umdat ie noe de DT variant aans'umme skriefft, herkent ut kofschip dit ok nie. Det dut de deure bienoa dichte, vandoar dat de deure van deurum eigenluk amper te ziene is.

Ma bie un lustrum heb ie vaake feestelijke bie-eenkomsten, ma det kan noe eenmoal nie in disse tied. En det hoeft ok helemoal nie.

Ut is a un lust um een verhaaltje of un gedicht op papier te kriegen. Doarveur muj soms diepe noadenken. Miene lust deel ik met un bakkje koffie, want de lust ik weh. Langzaam kump dan woord veur woord op papier. Het is un lust um te ziene dat een wit

vlak op de compjoeter swat wut van alle letters. Noe alleen nog ziene dat ut bie jullie kump.

Deurumme stuur ik miene stukkies van warklust deur noa de administrasie van ut dorpskraantie. Die zorgt dan weer dat ut bie jullie kump. Hoe mooi wuj ut hebben.

Ma noe kump ut, as op vrie'jdag ut gelle buukie deur de briembusse kump, kan ut gevecht beginnen. Wie um eerste in de haane hef, den mag um as eerste leazen. Nie'jsskierig wat veur verhaaltie der noe weer in stied. Det kan bie un bakkie koffie of un kumpke thee met un plak ontbijtkoek, net as vrögge as wie uut skoole kwaam. Det lek mie better dan den aandere reklaame van de opkickers. Zoep, det zoln meer luu mun doene. Ak det zol doene, zol ik de luu anzetten um al vrog an de drank te goane en det wul ik nie.

Ma ik dwaale helemoal of. Lustrum of nie, ik vind ut nog steeds un lust um veur jullie te skriem en hop dat jullie deurumme dit lustrumstukkje as hapkloare brok lust. Dan ziet wie doarnao weh weer hoe ut wieder giet.

## **Onweer in Hoarle.**

Is oe weh eens oppevaln dat wie eigenluk in un prachtig onweersgebied woont. Niet dat ik luu die der oojt is las van e'had hebt teeng de heure in wul strieken, want det is ut laatste wat ik wille. Aj der schaa van hebt e'had is a arg genug, loat stoane as der ok nog doojen of gewondern der bie bint e'valn.

Ik wulle ut gewoon is oaver ut onweer zelf hem. Aj un onweersschoer vanuut Roalte oonse kaante uut kump, dan is ma net hoe zwoar de buuje is. Det wul zeng, isse te zwoar, dan rengt ut em goed in Hoarle, veurdatte de barg oaver giet.

Aans wut ut, as zon buuje uut ut zuuden kump, van de kaante van Demter. Dan mutte doar eers a oaver de iessel hen.

Dan mutte nog un keuze maaken ok. Goa ik via Hoarle of langs de kaante van Holten langs de barg. Kösse ut laatste, dan wut Holten, Riessen en Nijverdalen, omdat de Regge dan ok nog wat te zeng hef, net as de knienenbarg.

Ma kösse de buuje de kaante van Hoarle, dan kregge ut vaake muulek asse langs de Sallaandse heuvelrug hen schoert. Asoffe dan meer um ziene as tolt en dan snelheid verlöss. Dan kriegt wie ok un bettie (völle)



water met. Zeker asse dan ok nog nie de barg oaver kan. Dan bleffe drei'jen en lötte ut water valn, tutdatte de wolken lig genoch bint zodatte de barg weer oaver kan. Giet dit weh in een keer, dan kriegt ze in Helndoorn, Luttenbarg of Lemele de stroate schoone. Tis dan ma net woar zo'n buuje dan hen trekt. Ma det zal mie dan ok un zörg wenne. Ut mooje schowspel is dan toch a weer veurbie. Tis ma weer wachen tutdat ut de volgende onweersbuuje weer langs kump. 's Nachts ziej de donderslaagn weh better en kan soms de luch ok helemoal gekleurd wenne. Ma snappe ok daj der bange van kunt wenne.

## **Puur natuur.**

Aj goed noa goat, kunt wie van de natuur völle leeren. Doar kwam ik op de vekaansie weh weer achter. Zat wat uut te rusten veur oonse tente en keek uut oaver ut gröss van oons veltie. Ut stuk was misskien vieftien meter breed en weh zestig meter lang. Alleen doarop was a genug te ziene. Zagge un miegemppe lopen met un dooje gaffeltange, terwijl knienties iets verder ant gröss zaten te knabbelen.

Zwaluwen scheren oaver ut veld, um zo ongedierte te vangen veur hun jongen, die nog in ut nest zit.

Un buuzerd hef zich uut de luch loaten vallen, um zo un vluchtende veldmoes te vangen. Doarveur zalle ziene skietgebedje in de luch weh hemme doane.

Op un takke van de iekenboom zit un paar holtdoeven. Un koolmees pikt de processierupse tussen de groem op de stamme van dezelfde iekenboom.

Rechts van mie in de stroeken um oonse plekke hen, zie ik un spinne noar ziene prooj kroepen. Den vliege leaft niet lange meer, a probeerte nog weh um doar weg te kommen.

Bie de buuren op ut veld, zie ik onder de hegge un gieteling een dikke piere uut de grond trekken.

Terwijl een kwikstaartje oaver ut veld huppelt en pikt tussen ut gröss. Toch hoalte oons goed in de gaten. Dan denk ik bie mie zelf, van die beeste kunt wie nog völle leeren. Zie scharrelt hun eigen etten bie mekaare. De ofvalpoegen ruumt de resten op. Zie leaft noast mekaar op un paar vierkante meter en goat toch gewoon hun eigen gang. Wat un bedrievigheid en nie ééne, den zich doar druk maakt um de aander.

Toch waarschuwt ze mekaare weh, ma dan alleene bie onroad. Ut oerr gevuul dut zien wark. Doarveur bint ze gin buurtapp op un mobiel veur neudig. Mobiel bint ze a en doet alles puur natuur. Det giet der altied nog weer met strieken. Zo blijft ze alert en ziet meestal ut gevoar an kommen. Aans heb ie pech e'hat.

## **Stoek'n op de snelweg.**

Laats reed ik oaver de snelweg A-èène van uut Almelo noar Déémter. Ik wasse ongeveer bie Riessen, toen de auto een keer begun te stoek'n. Doar noa reed'te gewoon weer deur. Em later ging ik un vrachwaang veurbie zonder verlichting án de achterkàante.

Deurumme ging ik ém veur um riene. De alarmlich'n dee'ik un keer an en uut, maar ôk miene laamp'n van de auto.

Offe det um nie anstund of zo, det week nie. Hij begun hadder te riene en kwààmp wel heel kot achter mie an. Toen vuuln ik weer un schok án miene auto. Hij zol mie tog nie e'raakt hem? Heel ém heulte ofstand, má ut duur'n nie lange of doar kwààmpe a weer op mie inriene. Opnieuw begun de auto te stoek'n, toen'de weer vlak achter mie zat. Noe wis ik bienoa zeker datte mie raakt hat.

Bie Holten goa ik der of, wat der ôk gebeurt. Det hat ik mie veure nöm. Want van zo'n bakbeest win ie ut toch nie. Um alleen doarumme in de kreukels te goan ling'n, doar hék nog gin zinne án.

Op ut lààst bie de ùtvoegstrook trek ik ant stuur en de auto giet in een keer ruk noa rechts toe, zonder da'k

doar má richting veur an hebbe gèem. Doar héf den bakbeest nie van terugge. Den bik noe mooi kwiet. Onderan bie de ofslag zie ik un oranje laampie braan. Gelukkig bin'k kot bie de bezienepompe. Doar zie'k dan ôk, ak um de auto loope um te tenk'n, dat den bakbeest mie nie eens heffe raakt. Noe wee'k dan ôk wat ut stoeken heffe oorzaakt.

Hoop dat je van deze verzameling hebt genoten.

Op mijn website staan nog meer verhalen en gedichten in deze bundelvorm.

Kom, kijk en download op:

<https://haarle15.jouwweb.nl/verhalen-gedichtenbundels>

Tot gauw.

Met vriendelijke groet,  
Martin Wichink.